



Fidoyilik —
Vatanga xizmat demak!

2024-yil 10-fevral, shanba,
17 (23.894)-son

KUN
HIKMATI

Kishining odobi
uning boyligidan
yaxshidir
Alisher Navoiy

1913-yil aprel oyidan chiqib boshlagan



www.zarnews.uz | https://www.facebook.com/zarnews.uz | @zarnews_uz | https://twitter.com/zarnews_uz

Viloyat hokimining QARORI

Samarqand viloyatida 2024–yilda davlat mulkidan foydalanganlik uchun ijara to'lovining eng kam stavkalarini tasdiqlash to'g'risida

O'zbekiston Respublikasi Vazirlar Mahkamasining 2023-yil 14-dekabrda "Davlat mulkini ijara berish tartibini yanada takomillashtirish to'g'risida" 660-son qarori, O'zbekiston Respublikasi Davlat aktivlarini boshqarish agentligi hamda Iqtisodiyot va moliya vazirligining 2023-yil 31-dekabrda (01/25-18/1119-son va 25/4-2-son) qo'shma xatlari hamda O'zbekiston Respublikasi Davlat aktivlarini boshqarish agentligi Samarqand viloyati hududiy boshqarmasining (2024-yil 4-yanvardagi (9-1-4-son) murojaatini inobatga olib, **QAROR QILAMAN:**

1. Quyidagilar:

Samarqand viloyatida 2024-yilda davlat ko'chmas mulkidan foydalanganlik uchun ijara to'lovining eng kam stavkalarini 1-ilovaga;

Ijara to'lovi stavkalariga qo'llaniladigan koeffitsientlar 2-ilovaga muvofiq tasdiqlansin.

2. O'zbekiston Respublikasi Davlat aktivlari agentligi huzuridagi Davlat mulki obyektlaridan samarali foydalanish markazining viloyat hududiy boshqarmasi boshlig'i (Y.Farhodov)ga:

davlat mulkini ijara berishni tashkil etish va ijara berish;

ijara berilgan davlat mulkini va uni ijara berishdan tushadigan mablag'larni hisobga olish va monitoringini olib borish;

ijara beriladigan davlat mulki bo'yicha ma'lumotlar bazasini shakllantirish;

ijara obyektlaridan maqsadli foydalanilishini va ularning saqlanishini, shuningdek, ijara to'lovi o'z vaqtida va to'liq to'lanishini nazorat qilish;

foydalanilmayotgan davlat mulki ijara berilishi to'g'risidagi e'lonlarni va ijara berilayotgan davlat mulklari ro'yxatlarini davriy nashrlarda hamda O'zbekiston Respublikasi Davlat aktivlarini boshqarish agentligi viloyat hududiy boshqarmasi va Savdo-sanoat palatasi viloyat hududiy boshqarmalarining veb-saytlarida joylashtirilishini ta'minlash topshirilishini.

3. O'zbekiston Respublikasi Davlat aktivlari agentligi huzuridagi Davlat mulki obyektlaridan samarali foydalanish markazining viloyat hududiy boshqarmasi boshlig'i (Y.Farhodov), viloyat soliq boshqarmasi (S.Eshmatov), shahar va tuman hokimliklari hududlarda ijara munosabatlari tartibga solish, ijara berilayotgan davlat mulki hisobotini

to'g'ri yuritish va budjetga qo'shimcha mablag'larni jalb qilish maqsadida davlat mulkini balansda saqlovchilari tomonidan ijara berish samaradorligini oshirish va tashkillashtirishda o'zaro hamkorlikni yo'lga qo'yin.

4. Vazirlik va idoralarning viloyat boshqarmalari hamda tizim tashkilotlari balansidagi davlat mulklarini xatlovdan o'tkazsin va bo'sh turgan yoki samarasiz foydalanilayotgan davlat mulklarini ijara berish bo'yicha har chorak yakuni bilan hisobot oyidan keyingi oynining 10-sanasi gacha Davlat aktivlari agentligi huzuridagi Davlat mulki obyektlaridan samarali foydalanish markazining viloyat hududiy boshqarmasiga bu mulkning joylashgan joyi, miqdori, tarkibi va boshqa umumiy tavsiflari ko'rsatilgan ma'lumotlarini taqdim etib borsin.

5. Viloyat hududida 2024-yilda davlat mulki bo'lgan binolar va xonalarda joylashgan budjet tashkilotlari uchun ijara to'lovining "nol" stavkasi belgilansin.

6. Viloyat hokimining axborot siyosati masalalari bo'yicha maslahatchisi – matbuot kotibi (M.Mirzayev) mazkur qarorni "Zarafshon" va "Samarkandkiy vestnik" gazetalarida e'lon qilinishini hamda viloyat hokimligining rasmiy veb-saytida joylashtirilishini ta'minlasin.

7. Viloyat hokimining 2023-yil 3-fevraldagi "Samarqand viloyatida 2023-yilda davlat ko'chmas mulkidan foydalanganlik uchun ijara to'lovining eng kam stavkalarini tasdiqlash to'g'risida" 38-7-0-Q/23-sonli qarori o'z kuchini yo'qotgan deb hisoblandsin.

8. Mazkur qarorning ijrosini nazorat qilish viloyat hokimining birinchi o'rinbosari F.Abilov zimmasiga yuklatilsin.

9. Ushbu qaror rasmiy e'lon qilingan kundan boshlab kuchga kiradi.

Viloyat hokimi

E.TURDIMOV

2024-yil 7-fevral

№ 33-7-0-Q/24

Qarorning ilovalari 3-sahifada.



Navoiyga avlodlar ehtiromi

Buyuk mutafakkir Alisher Navoiy tavalludining 583 yilligi munosabati bilan kecha Samarqand shahridagi alloma nomi bilan ataluvchi markaziy istirohat bog'ida ma'rifiy tadbir o'tkazildi.

Viloyat va shahar hokimligi mas'ullari, ta'lim muassasalari jamoalari, faollar va keng jamoatchilik vakillari ishtirokida o'tkazilgan tadbirda yozuvchi va shoirlar, olimlar so'zga chiqib, Alisher Navoiyning boy ma'naviy merosi va uni o'rganishning ahamiyati, shoir asarlarida ilgari surilgan g'oyalarning bugungi kun uchun ham dolzarbligini ta'kidladilar.

– Biz ulug' bobomiz Nizomiddin Mir Alisher Navoiy hazratlari qadami yetgan zaminda yashayotganimizdan har qancha faxrlansak arziydi, – deydi Samarqand davlat chet tillar instituti professori, navoiyshunos olimi Dilorom Salohiy. – U kishi ayni yigitlik chog'ida 24-25 yoshlarida Xurosondan Samarqandga kelib, ma'lum muddat shu yerda yashagan. O'z davrining yetuk olimi, ma'rifatparvar Fazlulloh Abullaysiy xonadonida yashab, uning madrasasida fiqh ilmi, tilshunoslik va adabiyotshunoslik

qoida-qonunlarini chuqur o'rgandi. Samarqand hokimi Ahmad Hojibek Vafoiy e'tibori va hurmatiga sazovor bo'ldi. Ulug'bek madrasasining mudarrisilari Mavlono A'loi Shoshiy, mavlono Olim Samarqandiyardan ta'lim oldi. Bu haqda ustozlarimiz, akademiklar Vohid Abdullayev va Boturxon Valixo'jayevning ilmiy tadqiqotlarida batafsil ma'lumotlar keltirilgan. Bugun dunyoda turkiy xalqlar bir-birlari bilan hamkorlik aloqalarini mustahkamlab, birlashayotgan paytda Alisher Navoiy merosi biz uchun yo'lchi yulduz vazifasini o'tamoqda.

Tadbirda viloyatdagi oliy o'quv yurtlari talabalari shoirning g'azal va ruboiylarini turli tillarda o'qidi.

Viloyat musiqali drama teatri aktyorlari tomonidan Navoiy siymosi aks ettirilgan sahna ko'rinishlari namoyish etildi.

Marosim qatnashchilari Alisher Navoiy haykali poyiga gullar qo'ydi.

Sana munosabati bilan viloyat musiqali drama teatrida Alisher Navoiy g'azallari bilan aytiluvchi qo'shiqlardan iborat konsert dasturi va badiiy dastur namoyish etildi.

Tadbirda viloyat hokimi o'rinbosari X.Ochilov ishtirok etdi.

Turkiyalik mutaxassisdan mahorat saboqlari



Viloyat bolalar ko'p tarmoqli tibbiyot markazi Turkiyadagi Kolan universiteti professori Ali Yilmaz ishtirokida bosh miya, orqa miya, umurtqa pog'onasi murakkab patologiyalari bilan davolanayotgan ikki nafar bemorda murakkab jarrohlik amaliyoti bajarildi.

Ali Yilmaz Turkiyadagi yetuk neyroxirurg va nefrofiziolog olim hisoblanadi. Ushbu yo'nalish bo'yicha tizimga bir qator yangi davolash usullarini kiritgan, og'ir ahvoldagi bemor bolalarning sog'ayib ketishiga hissa qo'shgan.

Turkiyalik mutaxassis markaz xodimlari hamda viloyatimizdagi boshqa tibbiyot muassasalarida faoliyat olib borayotgan nevropatolog, neyroxirurg, ortoped, fizioterapiya vrachlari mahorat darslari o'tib, o'z tajribalari bilan o'rtoqlashdi.

Bundan tashqari mutaxassis va uning yordamchilari tomonidan ambulator murojaat qilgan bemorlarga kerakli tavsiyalar berildi.

Dilnoza SOBIROVA.



Bir
jumlada

Urgut tumani Mirza-bog'lon va Chep mahallalarida 565 nafar aholi chuqurlashtirilgan tibbiy ko'rikdan o'tkazildi va 10 nafar fuqaro imtiyozli asosda bepul operatsiya qilinishi belgilandi.

Ishtixon tumani "Qiyot" mahallasida "Obod xonadon", "Obod ko'cha" va "Obod mahalla" mezonlari asosida amalga oshirilayotgan qurilish buniyodkorlik ishlari bilan bir qatorda tuman tibbiyot birlashmasi tomonidan fuqarolar uchun chuqurlashtirilgan tibbiy ko'rik tashkil etildi.

Kattaqo'rg'on tumani Yovi, Nayman va Vayrot mahallalari hududida "Xavfsiz tun" tadbiri asosida profilaktika inspektori va yoshlar yetakchilari bilan hamkorlikda yoshlar o'rtasida jinoyatchilik va huquqbuzarliklarning oldini olish maqsadida keng qamrovli profilaktik tadbirlar o'tkazilmoqda.

Samarqand tumani Yangiariq mahallasi hududida "Yashil jamoat parki" barpo etilishi uchun 5 gektar yer maydoni ajratilgan.

Payariq tumanida viloyat prokurorining tadbirkorlar bilan sayyor qabuli o'tkazildi.

Narpay va Xatirchi tumanini bog'lovchi, 4R56 yo'lida Zarafshon daryosidan o'tkazuvchi ko'priq investitsiya dasturi asosida rekonstruksiya qilinmoqda.

MEN SHIKOYATCHIMANMI?

Luqma

Savolni shunday qo'yishga majburman! Avvalo, men gazetaning "shtatsiz" muxbiridek bo'lib qolganimni boshqalar bilmasa ham sizlar yaxshi bilasizlar. Har oyda yozib turaman. To'g'ri, xatlarim gazetada chiqmaydiyu, unda ko'tarilgan "problemalar" hal bo'lyapti-da.

O'tgan oy ko'mir masalasida sizlarga yozganimdan so'ng tumanidan va mahalladan kelib, besh xalta ko'mir tashlab ketish chog'ida mahallamiz raisi "arizabozlikni bas qiling endi, hadeb mahallamizdan shikoyat yozaverasizmi? Har yig'ilishda hokim meni urishyapti. Masalangiz bo'lsa, o'zimga ayting, hal qilib beraman" dedi.

Ana, to'g'ri gap tuqqaningga yoqmaydi, deganlaricha bor-da. Jahlim chiqdi.

Shoshma, dedim raisga. Hali men arizaboz, shikoyatchi bo'lib qoldimmi? Yozgan bo'lsam, haqqimni so'rab yozganman. Yoki bolalarning bir oylik nafaqa pulini olib qolayotganingni, fermerning xotini bo'lgan singlingni "Ayollar daftari"ga kiritib, tikuv mashinasini berganingni, Amerikadagi ukangni ishsiz, deb hovlisida davlat puliga issiqxonaga qurib berganingni yozdimmi? Bekorchi yoshlarga berilishi kerak bo'lgan yerni qarindosh-urug'ing bilan bo'lib olganing haqida hech qayerga yozmadimku hali,

dedim. To'g'ri aytibmanmi?

Rostini aytam, shular haqida yozmoqchi bo'lib yurudim, lekin o'zimning "problemalarim" ko'payib ketdi-da. Eslaringda bo'lsa, uch oy oldin roddomga tushgan qizimga do'xtirlar yaxshi qaramagani haqida yozuvdim. Shu xatdan keyin so'rov boshlanib ketdimi, qizimni uyiga kelib ko'rishdi, ul-bul bozorlik ham qilib berishibdi, qishlog'imizdagi QVP mudirasi bo'lsa, har ikki-uch kunda qizimdan va nevaramdan xabar olib turadi hozir.

Yo'limiz notekis, o'ydim-chuqurligi sababli "Damas"imni har hafta remont qildirayotganim haqida viloyat hokimiga yozganimdan so'ng, tuman yo'lchilari kelib, darvozam oldigacha tosh to'kib, tekislab berishdi. Men tufayli qishloqdoshlarimning ham muammosi hal bo'ldiku.

Lekin bir yildan buyon bitta masalam hal bo'lmayapti. O'g'limni armiyaga olishmayotgani haqida yozgandim-ku, hech shuning oxiriga yetolmayapman. Sizlardan tashqari, hokimiyatga, prokuraturaga ham yozdim, javob bir xil – o'g'lingizning salomatligi harbiy xizmatga olishga to'g'ri kelmaydi. Bu harbiylarga qaysi tashkilotning gapi o'tishini bilmayapman-da. Bilganimda o'shalarga yozardim. Mabodo sizlar bilmaysizlarmi, qayerga murojaat qilsam bo'ladi?

Ha, ko'mir haqida yozayotgandim. Xullas, ko'mir masalasi yon qo'shnim mahalladan beryapti ekan, deb dar-

vozasi oldida bir moshina ko'mir tushirib, aka-ukalari bilan bo'lib olgach paydo bo'ldi. Menam mahallaga borib, raisdan ko'mir berishini so'radim. Har bir oilaga 700 kilodan arzon ko'mir berilar ekan, to'rt-besh qo'shni kelishinglar, bir moshin tushirib olasizlar, men xat qilib beraman, dedi. Men qarindosh-urug' bilan kelisholmaymanu, qo'shnilar bilan kelishib ko'mir olamanmi? Shartta o'tirdimu, sizlarga, "Xalq qabulxonasi" va hokimlikka ariza yozdim. Ana xatning kuchi bilan tekin ko'mirli bo'lib qoldim.

Aytinglar, shunda men shikoyatchi bo'lib qolamanmi? Rais meni "shikoyatchi" deb haqorat qildi. Bu haqda hokimiyatga, mahallalarning kattasiga ham yozdim. Lekin hech narsa o'zgarayapti. Rais o'z o'rnida ishlab yuribdi.

Yaqinda eshitib qoldim, haqorat qilganlik uchun sudga murojaat qilib, pul undirish mumkin ekan. Sudga shunday murojaat qilsam bo'ladi yoki ularda alohida tartib bormi? Iloji bo'lsa, shuni menga yozib yuboringlar!

Hozir nevaralarimdan internetda ishlash, telefonda videolar olishni o'rganyapman. Blogger bo'lmoqchiman. Shikoyat, ariza yozib yurmayman (o'zi keyingi paytda ko'zim ham xiralashib qolgan), video qilaman, internetga qo'yib yuboraman. Shundan keyin ham meni birov shikoyatchi deb ko'rsin-chi?!

SH.A.

